

VIJESTI



Za spas Krivaje šest miliona KM

Ugovor o komisionim poslovima između federalnog Zavoda za zapošljavanje (FZZZ) i Razvojne banke FBiH, koji je u funkciji očuvanja proizvodnog procesa i postojećeg nivoa zaposlenosti u IP Krivaje d.o.o. - u stečaju, Zavidovići, potpisan je jučer u Sarajevu. Radi se o ugovoru kojim se regulira implementacija komisione kreditne linije kod Razvojne banke FBiH iz namjenskog depozita FZZZ-a od 6.000.000 KM, a u skladu sa zaključkom Vlade FBiH od 28. marta. Potpisivanje ugovora na preskonferenciji, upriličenoj tim povodom, pozdravio je premijer FBiH Nermin Nikšić, podsjećajući da je taj čin rezultat ranijeg dogovora u vezi sa spašavanjem Krivaje. Kreditna linija koja se implementira putem Razvojne banke FBiH podrazumijeva komisioni kredit od 6.000.000 KM, s kamatnom stopom od tri posto i otplatnim periodom od pet godina, uz grejs-period od jedne godine.

Tvrde da nisu krivi za zločine u Dretelju

Ivan Zelenika, Srećko Herceg, Ivan Međić i Marina Grubišić-Fejzić izjasnili su se jučer pred Sudom BiH da nisu krivi ni po jednoj tački optužnice koja ih tereti za zločin protiv čovječnosti nad srpskim žrtvama u logoru Dretelj. Ročište za izjašnjenje o krivici optuženog Ediba Buljubašića biće održano naknadno, saopšteno je iz Suda BiH. Sud je potvrdio 13. marta optužnicu u predmetu Ivan Zelenika i drugi, prema kojoj su optuženi od maja do avgusta 1992, zajedno sa drugim osobama, počinili zločin protiv čovječnosti nad žrtvama srpske nacionalnosti zarobljenim u logoru Dretelj. Suđenje bi trebalo da počne 30 ili 60 dana nakon izjašnjenja o krivici.



Odbačen zakon o negiranju genocida

Zajednička komisija za ljudska prava, prava djeteta, mlade, imigraciju, izbjeglice, azil i etiku PSBiH na jučerašnjoj sjednici ponovno nije podržala principe prijedloga zakona o zabrani negiranja, minimiziranja, opravdavanja ili odobravanja holokausta, zločina genocida i zločina protiv čovječnosti, čiji su predlagači poslanici Azra Hadžiahmetović i Beriz Belkić. Protiv predloženog zakona i ovaj put su glasali članovi komisije iz Republike Srpske. Jedan od predlagača zakona Beriz Belkić je nakon sjednice komisije kazao za Fenu da je doživio ljudsko razočarenje. Zajednička komisija nije podržala ni godišnji izvještaj Institucije ombudsmena o pojavama diskriminacije u BiH za 2011, a protiv izvještaja su glasali članovi komisije iz RS-a.

Saradnja Agencije i Transparency Internationala UDRUŽENI PROTIV KORUPCIJE

Očekivanja od Agencije za prevenciju i koordinaciju borbe protiv korupcije Bosne i Hercegovine su velika, a uslovi za rad nikakvi

Memorandum o saradnji Transparency Internationala i Agencije za prevenciju i koordinaciju borbe protiv korupcije BiH potpisali su jučer u Sarajevu direktor Agencije Sead Lisak i Emir Đikić, predsjednik Odbora direktora TI-ja.

Potpisivanje ovog ugovora donosi institucionalizaciju i nastavak saradnje Transparency Internationala sa državnim institucijama u BiH i nastavak je priče o potpisivanju memoranduma iz prošle godine sa Ministarstvom sigurnosti BiH. On predviđa zajedničke aktivnosti na osnovnim djelatnostima koje će provoditi Agencija, to jest na provedbi strategije borbe protiv korupcije i akcionog plana za borbu protiv korupcije. Također, ovo je naš vid podrške agenciji koja, kao što znamo, nema usvojenu sistematizaciju, nema usvojen budžet, a očekivanja od nje su velika, istakao je Đikić, te dodao da je za



Lisak i Đikić potpisali memorandum

Foto: A. KAJMOVIĆ

početak borbe protiv korupcije potrebna politička volja.

Agencija za prevenciju korupcije i koordinaciju borbe protiv korupcije još nema svoje prostorije i kapacitete za ispunjavanje aktivnosti predviđenih zakonom.

Shvatajući značaj saradnje sa civilnim društvom, potpisali smo veoma bitan dokument za Agenciju. Izražavam zadovoljstvo što je upravo Transparency International naš prvi partner u saradnji. S obzirom na to da nemamo svoje kapacitete sva dosadašnja spoznaja o percepciji korupcije u BiH odnosi se na informacije koje je istražio i prezentovao TI. Dakle, mi ćemo pokušati da udružimo snage, a otvoreni smo i za druge nevladine organizacije da se pridruže ovom memorandumu kako bi konačno ubrzali ili pospješili realizaciju strateških mjera, kazao je Lisak.

M. PAMUK

NASTAVLJENO SUĐENJE VESELINU VLAHOVIĆU



Veselin Vlahović: Odvodio ljude

Batko je imao svoj spisak

Dva dana nakon ubistva jednog srpskog vojnika na Grbavici, optuženi Veselin Vlahović i nepoznati vojnici odveli su nekoliko ljudi iz zgrade, koji se nikada nisu vratili, rekao je Muhamed Kalota, svjedok Tužilaštva BiH, na jučerašnjem nastavku suđenja za zločine počinjene u sarajevskim naseljima Grbavica, Kovačići i Vraca 1992. godine.

Svjedok je rekao da se nakon ubistva srpskog vojnika pričalo kako će neko sigurno dolaziti da ispita šta se dogodilo. Prema svjedokovom iskazu, nakon dva dana pojavili su se optuženi Batko i još jedan vojnici. Oni su iz ulaza odveli komšije Mustafu Zelea, Zvonka Bodulovića, Hajrudina i Sabahu Hasanović, kojima se gubi svaki trag.

Ibrahim Zele, drugi jučerašnji svjedok, čiji otac je u junu 1992. odveden u grupi sa ostalim komšijama, rekao je da je od majke saznao moguć razlog odvođenja oca i komšija. Prema svjedokovim riječima, njegov otac i trojica komšija odnijeli su mrtvo tijelo srpskog vojnika na ugao ulice na Grbavici i predali ga nekome. Svjedok je ta saznanja dobio od svoje majke, koja danas nije živa. Ona mu je rekla da su optuženi Batko i vojnici koji su došli po komšije, imali njihova imena. Zele je rekao da su sva tijela, osim tijela njegovog oca, pronađena na različitim lokacijama u okolini Sarajeva.

Optužnica tereti Vlahovića za ubistva, silovanja, zlostavljanja, pljačku, nestanke i druga nečovječna djela, počinjena 1992. nad civilima bošnjačke i hrvatske nacionalnosti. Suđenje se nastavlja danas.

D. M.

Ministarstvo prostornog uređenja i zaštite okoliša TK-a

Dozvola za cestu Kreka - Šićki Brod



Bubić i Vujeva sa saradnicima

Senija Bubić, ministrica prostornog uređenja i zaštite okoliša Tuzlanskog kantona, jučer je uručila Filipu Vujevi, direktoru JP Ceste Federacije, okolinsku dozvolu za rekonstrukciju i proširenje magistralne ceste M4, od Kreke do petlje Šićki Brod u Tuzli.

Kako je kazala ministrica Bubić, radi se o izuzetno značajnom projektu za Tuzlanski kanton, a okolinska dozvola je jedan od

elemenata kako bi JP Ceste Federacije dobile urbanističku i građevinsku dozvolu.

“Očekujemo da ćemo imati puno toga da radimo i u narednom periodu, jer smo nadležni za sve dionice čija je dužina ispod deset kilometara”, rekla je ministrica Bubić.

Kako je ranije najavljeno, projekat rekonstrukcije i proširenja dionice puta Kreka - Šićki Brod koštati će oko 12 miliona maraka.

S. K.

Ustavni osnov za finansiranje institucija BiH

Ustavna komisija Doma naroda Parlamentarne skupštine BiH jučer je u Sarajevu utvrdila postojanje ustavnog osnova za prijedlog zakona o dopunama Zakona o finansiranju institucija BiH. U raspravi o ovom prijedlogu zakona, kojim se predlaže veća autonomija Parlamentarne skupštine pri kreiranju njenog budžeta u odnosu na Vijeće ministara, ocijenjeno je da u BiH treba riješiti pitanje pozicioniranja pojedinih segmenata vlasti. Komisija je jednoglasno utvrdila postojanje ustavnog osnova za prijedlog zakona o izmjeni Zakona o Državnoj agenciji za istrage i zaštitu, kojim se i zakonski kao sjedište Agencije određuje Istočno Sarajevo, gdje se nalazi nova zgrada ove institucije. Članovi Ustavne komisije razmotrili su i poslaničku inicijativu Nermine Zaimović - Uzunović (SDP) i dali mišljenje da za izradu zakona o političkim strankama u BiH nije potrebno formiranje posebne interesorne radne grupe.